


六典通考



六集通考



六典通考卷五十三

膳飲考

湖西閻鎮珩輯

燕兄弟

王者親親之禮有族燕有族飫傳曰王公立飫則有房
烝親戚燕饗則有殽烝燕以致其愛故牲體折節而殽
烝飫以致其嚴故牲半解而房烝然燕之禮有時燕有
因祭而燕國語曰時燕不淫在詩則棠隸湛露是也坊
記曰因其酒肉聚其宗族在詩則楚茨行葦是也蓋先
王以孝弟治天下未嘗一日忘其親戚宗族是以飲食
之禮隆焉且非特天子諸侯爲然楚茨云諸父兄弟備

言宴私此卿大夫祭祀之詩也儀禮特牲祝告利成徹
庶羞設於西序下注引書傳曰宗室有事族人皆侍終
日大宗已侍於賓奠然後燕私燕私者何也祭已而與
族人飲此徹庶羞置西序下者爲將以燕飲與書傳云
不醉而出是不親也醉而不出是渫宗也出而不止是
不忠也親而甚敬忠而不倦惟如是而後兄弟之道備
焉

大宗伯以飲食之禮親宗族兄弟

親者使之相親人君有食宗族飲酒之禮所以親之

也文王世子曰族食降一等

大傳上治祖禰尊尊也下治子孫親親也

旁治昆弟合族以食序以昭繆別之以禮義人道竭矣

治猶正也

繆讀爲穆

同姓從宗合族屬異姓主名治際會

合謂合之宗子之家序昭穆也異姓

謂來嫁者也主於母與婦之會也繫之以姓而弗別綴之以食而

弗殊連綴族人以飲食之禮而不殊異也君有合族之道族人不得以其戚戚

君位也合族者言設族食燕飲有會合族人之道文王世子若公與族燕則異

姓爲賓膳宰爲主人公與父兄齒族食世降一等異姓爲賓

相賓客之道膳宰爲主人君尊不獻酒也與父兄齒親親也族食世降一等親者稠疏者稀公與族燕則

以齒而孝弟之道達矣其族食世降一等親親之殺也與族

以齒以至尊不自異於親之列殺差也月令季冬之月命樂師大合吹而罷

歲將終與族人大飲作樂於大寢以綴恩也言罷者此用禮樂於族人最盛後年若時乃復然也凡用樂必有禮用禮則

有不用樂者逸禮王居明堂禮季冬命國爲酒以合三族詩

小雅常棣序常棣燕兄弟也謂王者以兄弟至親宜加恩惠

作此詩焉兄弟者其父之親推而廣之同姓同族皆是也常棣之華鄂不韡韡凡今之人

莫如兄弟

箋承華者曰鄂不當作拊拊鄂足也鄂足得華之光明則譁譁然盛喻弟以敬事兄兄以榮覆弟恩

義之顯亦

死喪之威兄弟孔懷原隰哀矣兄弟求矣脊令在

原兄弟急難每有良朋況也永歎兄弟鬩於牆外禦其侮每

有良朋烝也無戎喪亂既平既安且寧雖有兄弟不如友生

儻爾籩豆飲酒之飫兄弟既具和樂且孺

儻陳飫私也不脫

族會曰和孺屬也王與親戚燕則尚毛

妻子好合如鼓瑟琴兄弟既翕和樂且

湛

好合志意合也合者如鼓瑟琴之聲相應和也王與族人燕則宗婦內宗之屬亦從后於房中

正義曰飫

私釋言孫炎曰飫非公朝私飫飲酒也周語有王公立飫又

曰立成禮烝而已飫既爲私不在公朝在路門內也酒肉所

陳不宜在庭則在堂矣燕禮云皆脫屣乃升堂少儀云堂上

無跣燕則有之是燕由坐而脫屣明飫立則不脫矣故云不

脫屣升堂謂之飫知飫禮爲圖非常議大疑者以周語云王公之有飫禮將以講事成章建大德昭大物言講事昭物是有所謀矣明圖非常議大疑而爲飫禮也周語曰王公立飫則有房烝親戚燕饗則有殽烝又曰飫以顯物燕以合好則飫燕禮異序曰燕兄弟此陳飫者圖非常議大疑乃有飫禮則飫大於燕天子燕宗族之禮亡所以知王與族人燕則宗婦內宗從后者湛露曰厭厭夜飲不醉無歸傳曰夜飲私燕也宗子將有事族人皆侍不醉而出是不親也醉而不出是渫宗也箋云天子燕諸侯之禮亡此假宗子與族人燕爲說耳然則天子燕同姓諸侯之禮猶宗子燕族人則天子燕宗族兄弟爲朝廷臣者如宗子於族人可知案特牲饋食禮祭

末乃曰徹庶羞設於西序下云爲將餽去之庶羞主爲尸非神饌也尙書傳曰宗室有事族人皆侍終日大宗已侍於賓奠然後燕私燕私者何也已祭而與族人飲也此徹庶羞置西序下者爲將以燕飲與然則自尸祝至於兄弟之庶羞宗子與族人燕飲於堂內賓宗婦之庶羞主婦以燕飲於房也鄭以彼特性是宗子之祭禮族人與族婦皆助故經云宗婦執兩籩宗婦贊豆是宗婦與族人俱助宗子之祭及祭末族人旣爲宗子所燕明宗婦亦主宗之燕可知矣

秦蕙田曰王與族人飲食之禮有二一曰族燕族食平居無事則爲燕以申好大傳所謂合族以食大戴記季冬命國爲酒以合三族是族燕也又因祭而燕楚茨諸父兄弟

備言燕私中庸燕毛序齒是亦族燕也一曰族飫國語王公諸侯之有飫也將以講事成章建大德昭大物也故立成禮而已注立成不坐也烝升也升其滿物而已又曰歲飫不倦時燕不淫據此則燕禮主於親愛而和好飫禮主於嚴肅而整齊嚴肅者易倦親愛者易淫故國語云然此詩傳箋正義敘燕飫之禮頗詳然傳以第六章賓爾籩豆爲飫私又曰王與親戚燕則尙毛是一章而飫與燕兼之箋直據國語之文以證飫私之義疏遂以上二句爲飫下一二句爲燕竊謂毛鄭特泥飫字而爲此解耳此詩上五章備言兄弟當親愛之故至此乃入燕飫正文極道其和樂之情飫字第寫其醉酒飽德之意非所謂圖非常議大疑

之事也又六章妻子好合如鼓瑟琴兄弟既翕和樂且湛
亦申言飲食宴樂兄弟和好之義似亦不專指宗婦內宗
燕於房者言故先儒說詩多不從箋疏今以其論燕飫之
禮頗詳姑存之然亦不甚明晰

大雅行葦序行葦忠厚也周家忠厚仁及草木故能內睦九

族外尊事黃耆養老乞言以成其福祿焉

箋九族自己上至高祖下至元孫之

親也朱子詩傳此祭畢而燕父兄耆老之詩

敦彼行葦牛羊勿踐履方苞方體惟

葉泥泥戚戚兄弟莫遠具爾或肆之筵或授之几

戚戚內相親也肆陳

也或陳筵者或授几者無近俱揖族而進之年穉者爲設筵而已老者加之以几

肆

筵設席授几有緝御或獻或酢洗爵奠斚醢醢以薦或燔或

炙嘉殽脾臠或歌或嘏

設席重席也歌者比於琴瑟也徒擊鼓曰嘏

敦弓既堅四

鏃既鈞舍矢既均序賓以賢敦弓既句既挾四鏃四鏃如樹
序賓以不侮曾孫維主酒醴維醕酌以大斗以祈黃耇黃耇
台背以引以翼壽考維祺以介景福

秦蕙田曰常棣行葦二詩古盛王以飲食之禮親宗族兄
弟之實際也常棣爲燕飲之樂將以深致其莫可喻之情
而反極之急難禦侮以著其非良朋所得而擬而復道其
燕會歡飲室家好合以感動其天性之良骨肉之愛體貼
精到而反覆長言之者無以加矣行葦由物理以察人倫
維葉泥泥戚戚兄弟之詞懇款親切惻然惟恐傷之千載
而下猶能使人興起聖人篤親親以化平天下其精意固
如此矣至于禮樂牲醴之盛威儀節次之詳又有可考焉

先之以肆筵設几筵有席几有御陳設之備也繼之以獻酬奠筓賓主之禮也考燕禮諸侯燕其臣以膳宰爲主人主人獻賓賓卒爵賓洗爵酬主人主人卒爵主人獻公公卒爵公酌酬主人主人卒爵於是主人酌以酬賓賓奠而不舉詩之或獻或酬洗爵奠筓正與禮合文王世子云族燕則異姓爲賓膳宰爲主人是也其牲牢酒醴則有醢有醢有燔炙正饌之外有嘉餼脾臠籩豆而從獻加爵之禮行矣至於合樂以道和序射以辨賢而凡敬老乞言頌禱之事無不舉焉可謂盛矣蓋其合也禮樂之美兼有饗食之儀文而將之以親愛本之宗廟之昭穆而聯之以歡樂所謂別之以禮義而孝弟之道達者與飲食之禮見於

禮經者甚略今詳疏其辭義以補逸禮所未備云

小雅湛湛湛湛露斯在彼豐草厭厭夜飲在宗載考

箋豐草喻同姓

諸侯也載之言則也考成也夜飲之禮在宗室同姓諸侯則成之於庶姓其讓之則止

陳祥道曰夜飲

之禮在宗室同姓諸侯則成之於庶姓其讓之則止正義書

傳曰既侍其宗然後得燕私者何既而與族人飲飲而不醉

是不親醉而不出是不敬與此傳同毛伏俱大儒當各有所

據而言也燕禮曰宵則庶子執燭於阼階上甸人執大燭於

庭闈人爲燭於門外是兩階門庭皆有燭也楚茨諸父兄

弟備言燕私

箋祭禮畢歸賓客豆俎同姓則畱與之燕所以尊賓客親骨肉也

樂具入奏以

綏厚祿爾殽既將莫怨俱慶既醉既飽小大稽首神嗜飲食

使君壽考孔惠孔時維其盡之子子孫孫勿替引之

箋燕而祭時之

樂復皆入奏以安後日之福祿骨肉歡而君之骨肉安女之
節羞已行同姓之臣無有怨者而皆慶君足其歡也小人猶
長幼也同姓之臣燕已醉飽皆再拜稽首曰神
乃歆嗜君之飲食使君壽且考此其慶詞也
中庸燕毛

所以序齒也

燕毛祭畢而燕則以毛髮之
色別長幼為坐次也

禮書先王之於同姓有時燕焉有因祭而燕焉國語曰時

燕不淫此時燕也詩曰諸宰君父廢徹不遲諸父兄弟備

言燕私坊記曰因其祭肉聚其宗族以教民睦此因祭而

燕也其禮之詳雖不可考要之服皮弁服即於路寢王皮弁以

日視朝詩刺不能宴同姓而曰有頍者弁則皮弁也宰夫為主異姓為賓王與族人

燕於堂后帥內宗之屬燕於房其物節烝所以合好也其

食世降一等所以辨親疏也昭穆以序之所以明世次也

夜飲以成之所以別異姓也若夫几席之位升降之儀脫

屢而坐立監相禮羞庶羞以盡愛爵樂無算以盡歡其大
率蓋與諸侯燕禮不異諸侯燕族人與父兄齒雖王之尊
蓋亦不以至尊廢至親也

小雅頍弁序頍弁諸公刺幽王也暴戾無親不能宴樂同姓

親睦九族故作是詩也

時同姓之諸公刺幽王也爲不能宴樂同姓明諸公是同姓諸公也不能

宴樂卽不能親睦親睦由於宴樂以經責王之不宴樂今不親睦故分而言之耳

有頍者弁實維伊

何爾酒旣旨爾殽旣嘉豈伊異人兄弟匪他薦與女蘿施于

松柏未見君子憂心弈弈旣見君子庶幾說懌

箋禮天子諸侯朝服以宴

天子之朝皮弁以日視朝女酒已美矣女簪已美矣何以不用與族人宴也王所當與宴者豈有異人疏遠者乎皆兄弟與王無他言至親刺其弗爲也幽王久不與諸公宴諸公未得見幽王之時懼其將危亡故憂而心奕奕然若已得見幽王諫止之則庶幾其改變意辭懌也有頍者弁實維何期爾酒旣旨爾殽旣時

豈伊異人兄弟具來薦與女蘿施于松上未見君子憂心怲怲既見君子庶幾有臧

方觀承曰頍弁集傳謂燕兄弟親戚之詩不從傳專言同姓然禮族燕必以異姓爲賓異姓古稱曰甥舅則雖宴同姓固有異姓之實在且角弓之詩曰兄弟婚姻亦兼異姓爲言序主九族傳從之是序說原未可廢第傳曰宴序曰刺不宴樂意若相反然詩曰爾酒既旨曰君子維宴安在其非宴乎曰死喪無日無幾相見安在其非刺乎情不迫於棠棣文不備於行葦雖宴無以成歡故詩人傷心於集霰以著交瘳之漸迨胥遠胥傲斯角弓興悲而葛藟有終遠之誚杕杜抱獨行之感焉傳表其事序推其微文殊而

義一也然則角弓諸詩爲不合族者示戒頰弁之詩又爲合族而情文不具者示戒飲食之於人不綦重乎伐木之詩曰民之失德乾餼以愆又非特兄弟族姓間爲然矣

周語定王謂晉隨會曰郊禘之事則有全烝王公立飫則有

房烝

禮之立成者爲飫

親戚燕饗則有飭烝

飭烝升醴節折之俎也謂之折俎

今女

非他也而叔父使士季實來唯是先王之燕禮欲以貽女余

一人敢設飫醴焉夫王公諸侯之有飫也將以講事成章

程

建大德昭大物也

大德大功也大物大器也

故立成禮烝而已

立成不坐也烝

升也升其備物而已

飫以顯物燕以合好

顯物示物備也

故歲飫不倦時燕不

淫

敬王十年莢引欲城周衛彪傒見單穆公曰昔武王克

殷而作詩作此以爲飫歌名之曰支以遺後之人使永監焉